



PL  
2698  
K22  
1761  
V. 2

















康對山先生文集卷之二

後學

同邑孫景烈孟揚選次

長白瑪星阿景謙叅閱

王應槐兆三

邑後學耿性直伯正校張書紳公佩分校

何瑞雲卿

書

與彭濟物

數年不覩光範偶辱過問卽甚慰甚慰然又倏爾而別此情如何明日逢德光道及雅愛云云此誠斯文



骨肉之至他人誰肯然者感灼累日然竊有所未安者因公知我厚故不避訶責輒布上左右惟公察之聽之僕自庚午蒙詔之後卽放蕩形志雖飲酒不多而日與酩酊爲伍人間百事一切置之此不但信於鄉人妻子奴僕也蓋素性疎懶偶因官秩羈係數年若招豚臂鷹而一旦得此中心之快實有人所不知猶爾不量卽又飲酒散髮箕踞林麓此其性習之已成激之不返雖三公之貴刀鋸之辱不可奪也况數



石之粟半幅之紙乎僕自幼支謾無狀性好是古而非今始仕時望見先皇帝寬仁大度卽自私擬以爲臯夔稷契之業可以復見於今而狂放易言畧不修飾至皇帝嗣位之後又見其英毅果斷益喜益負以爲鄙志當究於此一時交與之士反覆輕易不檢惟僕言是是故謾論譏說畧無忌畏日就月將幾踵竒禍幸免殺身而歸而二三者又補砌所無以爲眞有使僕含垢於有罪者之籍與不肖之人同被驅放上辱兩朝作養之恩下累先人蠲介之業生平微志付之穢塗情苦心局不復自愛暇日偶讀皇甫規避梁



冀之事與蔡雖卻九錫之書喟然嘆曰彼何獨不得  
含垢冒污而成致美節如此也又偶讀柳宗元傳曰  
卽宗元有不同於叔文然親與之交而受其職任矣  
夫身有規雖之操而迹厠宗元於九錫之間仁人志  
士宜於此何如也今僕之所憂者在忽有犬馬之疾  
死邱壑之下不得伸其宿心原悰耳而區區官秩之  
事非所念慮也瑾之用事也蓋嘗數以崇秩誘我矣  
當是時持數千金壽瑾者不能得一級而彼自區區  
於我我固能談笑而卻之使饕餮熾饒之人卒不敢  
加於我此其心與事亦雄且甚矣當朝大臣蓋皆耳



聞目見而熟知其然方臺諫論列之際出於一時倉卒未暇差別而今則又數年矣夫伊尹之輔商也一夫之不獲則曰時予之辜僕卽非賢者然豈少於商之一夫哉大臣者乃忍使之雜於孫聰曹元與云云之間邪故鄙人之心至此益放益已披髮嘯歌至於終身而不敢悔此非甘心爲長沮桀溺之徒也公之高義曰古人內舉不避親時之可舉不可舉非僕所知也而僕之不才污穢亦非公應舉之人觀近臣者以其所爲主於此使識者苟爲之言則所係於公者豈細哉今僕之不可於當世者有五而甚不宜出就



官職者有二性喜嫉惡而不能加詳聞人之惡輒大  
罵不已今諸公者皆喜明遜而陰譏此一不可翰林  
雖皆北面事君而勤渠閣老門下者以爲賢能僕嬾  
放畏出歲不能一造其戶此二不可人皆好修飾文  
詐僞恭假直而僕喜面訐人未有不怒者此三不可  
士大夫不務修身法事之業而但呻吟詩文以爲高  
業見其詩若文不能不怒故見輒有言而彼方望我  
以爲美也我以言加之此四不可與相好者接必因  
其職事加勉戒之詞多忤其所好彼或未從卽拒而  
絕之以此親疎多怨苟復見其所愛者又不忍不告



或又告之彼卽又不從而僕又絕之此五不可執德  
不宏不能信之於人雖頗自好而當世談論之士多  
加詆謗自入有罪者之籍污穢終身莫能自潔使平  
日所立之志局閉淪落智高萬物之上而名陷九淵  
之下於中夜竊自嘆悔不當輕易效慕世俗科舉徇  
外構此冤慝今又不儆而欲仕乎此甚不宜出者一  
一時同黜之人固有不幸而被污者然罪大惡極羞  
談於婦人女子之口尚十之九彼莫不覬幸僕出以  
爲先容之地而當時宰執又率崇私愛而乏分別苟  
欲引其私人必援僕爲喻是所以用僕者非必實知



其爲人而眞明其有誣也如此則是以賢者之身而爲不肖者之資矣語有曰君子非其招不往以不賢人之招招賢人如之何其可往哉今衆人雖以不肖謂僕而僕未嘗一日不以賢君子自謂已如此自謂而人以彼謂已蓋所謂嘽爾而與乞人不屑者也此甚不宜出者二明公之意特出於一時愛念之篤偶未詳究及此然言出乎口通乎心明有日月幽有鬼神此區區平素之惓可一鑒而盡者公如覺之必信其爲肝膈之實慨然憐我體我矣曾公甚難旣會又復匆匆不得請益而又不能迎候敝邑此甚負公也



諒公有以恕之乎臨紙惘然春和伏惟保順幸甚

與王子衡

數日之別已勝數年矣諒公同此情也華山之遊此平生至願况又與吾兄同之抵家後百事狼狽荆妻痰氣發作幾於不起小女出嫁伊邇未免匍匐耳富有富者之事貧有貧者之禮父息之情誰能不爾坐此二者使不肖倉卒言兄長之前顧不得羽翼而東耳柰何柰何在省時會近山尚書濟物總制俱道雅意隆篤細得近山言深服公所以處我者有禮也近濟物以他人之謀將致我幕下昨已爲數言絕之頗



涉峻厲於乎彼殆以我爲何人耶大丈夫出處自有  
禮義豈私好私與者尋隙投釁附會可致耶兄與我  
有骨肉之分當憫惜至此邱壑之下凡有志天下國  
家者豈所忍居苟有所不可則亦寧死守而不易耳  
平生碌碌別無他事維此點檢最熟而又失之死無  
面目見先人於地下也蓋此又是一番波浪比之往  
日應舉不同如之何可以輕且易而言也厚齋之意  
雖善然非實知我者固已惑之矣然乘之則不可也  
去秋有一客相過極言彼所以拳拳於僕之意方在  
杯酒間僕變色大罵聲徹四隣僕豈彼之所宜論耶



昨見自彼來者云彼已深含於我此不知僕正欲其  
含也卽此可以再見不肖之心矣張吏來甚急因先  
附此意不恭之罪吾兄想深有以亮之稿序數日後  
當托人附上不敢負吾兄也臨紙耿耿無已

與朱升之

天下之事能以德美傳不朽者今不過數人耳然皆  
爲言者所遏此固世道使然然皆以黯昧難曉者或  
偶爾有之而超然在人耳目者亦不能免此可長太  
息而繼之以痛哭也公清聲大才雅量恢節孰與古  
人多讓彼以私怒左道之言卽又如此賢哲之黨盡



矣公固不肯緣此輕重言者國是所關治亂所繫小人坐享清譽而君子蒙被污辱欲天下亡事安可得哉李獻吉被論尤廣至有以敗壞風俗言者於乎獻吉豈斯人哉此可以占公矣僕雖宿寡行檢然視鄉黨自好者亦少有優劣乃前此命爲劉瑾黨士修學之志雖古人所至尚安有推擇何至黨瑾者苟可以甘心快意固不暇計此也公不知尚移何處卽或以別事在關中亦好當請公西來與坐論數夜使細小輩見吾儕胸次忠君孝親立身行已死不以易如此兩卷俱封上媿不足稱副委命書籍托劉令尹數日



後卽可馳上公卽有外移廿六行當在何日然須待命  
至乃始動否倘行急可示知之僕卽星夜來求靜處  
與公別也使來數日爲賓客所冗不得具裁甚惱臨  
紙又復匆匆不盡其欲言伏惟亮察幸甚

上邃庵先生

執事此行宗社之慶生民之福也不肖萬萬死罪無  
面躬詣拜賀今兵事日繁賦餉日急各處經畫糧儲  
之人率不堪職動爲迂濶難集之計百姓百倍陪費  
不支一行之需倘賊勢更盛又當何以山南湖廣之  
盜不可視爲尋常今之求治者率弟子行當亟須丈



堂山文集 卷之二  
人也詳此盜能老嫗我師者中固有人耳往時四川  
湖廣陝西所上首級盡山居平民非真賊也凡執事  
所以報孝宗皇帝者惟此二事耳不肖雖在罷廢然  
世受國恩不敢忘此憂也初冬微寒伏惟保艾以慰  
天下之望不宣

與張用昭

辱教知近事如此數日身心不能自寧况有官者與  
受方國之重者哉然以執事之才當此劇難狼狽之  
際要夥有餘力顧委任何若耳廣郡數蒙其至無他  
郡芟夷絕滅之慘者不可謂無所繫也近聞邱將軍



與戰南陽獲俘甚多若爾亦新來一快事但其啓行時言語甚易無懼事愼敵之心恐非名將家法也賢郎文雅勤事此最學者艱節其聞抄寫文字似於下學上達之旨稍相違背盍若令之潛沉諷詠自求於經訓之間旣通貫融液然後操紙命辭自必有過人者而奚俟此敗故駁雜之語哉公家世有大方諒不須吾言吾自不能不爲之言耳春和惟萬萬保重

與張邯鄲書

於公雖尠素交然公爲鄉里豪俊之士居官之聲動燭遠邇此吾所甚慕也東方盜賊薄公城邑凡幾矣



公能悍然無懼以作其民邯鄲數得無恙其係豈細  
小哉願公益加嚴愼肅練士民倡率豪傑攻城約以  
死守城危誓以死戰彼雖號有數萬然中多婦人瘠  
氓精兵要千人耳旣擁衆抗軍不能留蓄寄民而所  
過殘滅并白釜餽罔有孑遺必無恒飽之理此應敗  
之道也昔吾懼警邢郡返過邯鄲見其人率勇敢有  
氣吾恨不能丞尉以作其武幸聞公大抵甚慰矣况  
又有近功邢鄙諺曰莫眠其步當眠其趾夫民旣以  
覘彼之所爲矣今戰亦死不戰亦死甚曉然也然不  
戰固死使力戰安知其不生邪此可以語邯鄲之民



使之自固其志矣愛公甚深見公邑人來不辭惘然  
敢告以此今之名將未有類公者也春和惟爲民自  
重萬萬

與王敬夫

亡兒志文至亟與登石間兒婦楊氏食砒霜不踰時  
遂死此十一月七日巳亥事也痛徹心骨殆何忍言  
念惟此婦自五月念二栗死卽堅志死節荆妻及諸  
女輩日夜防衛已極縝密乃于其月念九潛服毒鼠  
藥數匕幾不可生賴覺之頗早得以投救至于今日  
每聞妻女所傳婦言其志必不肯回因諷之省厥父



母冀至膝下或以愛奪乃悔恨彌切日夜號泣欲西  
南麓公與許夫人不得已令其兄宋與其嫂舍姪女  
送之來仍以有心婦女一人常用伴侍婦至栗極哭  
畢入內見荆妻殊有喜色曰吾謂夫已葬不知猶未  
也荆妻私意其語謂予曰新婦志大不易行必有變  
奈何予曰汝但多方防衛可也翌日與諸防衛者相  
處極歡有一出者必止之曰汝出吾怕也畧不一言  
往志衆以爲旣見父母果懷眷戀後將無事荆妻者  
獨不以爲然令嚴爲環守是旦粧洗畢假言宿飯作  
渴索醋湯臥內飲不知潛帶碎砒二三兩隨飲吞盡



少間砒毒內作與侍兒登厠歸漸不能支乃誑小女  
及妾楊氏曰吾適登厠見崇身頗不佳幸與紉箸襪  
之又索醋湯令極煖來連飲三椀許曰稍可矣荆妻  
入見其色驚扣所以因切疑之搜其袖有遺砒始知  
中毒亟呼家衆尋醫治之婦徐曰妾此來欲以死從  
夫遊地下前所囊物實砒霜數兩假言爲金珠使姑  
不疑我今已盡服人言砒霜用醋下者百藥不能解  
恐舅姑及吾兄以藥解吾毒則大壞吾志是以連飲  
醋湯數椀可喚吾嫂來治吾後事滿門驚痛呼其兄  
嫂至因以解藥予之閉口不納逼之太急則咬椀立



破每藥來則輒揮去堅閉其口楔以鐵箸且曲矣齒  
堅合不啓也曰吾與飲此吾不食砒霜矣今吾以死  
爲樂以生爲苦也奈何以苦事逼我其嫂啓篋出衣  
皆婦近日所製以爲臨死之用者無有不備與不精  
也著畢氣絕予痛哭幾死以爲曩者栗初死時情激  
心裂痛莫可制其死或易至於歸謝其父母又三月  
餘矣父母劬勞之恩眷屬繾綣之意顧不能一移其  
初志而不迫不怒從容就死如此古之達人志士不  
足與之先也顏子爲孔門高弟夫子特稱其三月不  
違仁而新婦少年女子耳乃其志久而愈恒彼豈嘗



從事于學問若士大夫孳孳亶亶者也其天資之高  
父母之教要有不可誣者矣荆妻言新婦數向予言  
古今賢女故事云得之其父兄講說今日之死豈非  
聞之于耳卽感之於心而不忘耶夫人食利藥少許  
必疾痛萬狀新婦服砒甚多比死顏貌安舒畧無倉  
卒豈鬼神陰以相之使其毒不內撓正色以斃也栗  
爲人頗靳非辟不正之行嘗曰姦污殘賊天道未有  
弗與還者故行年二十有二曾無一毫非禮之動乃  
天畀以良妻若是天信有徵也哉此婦與令愛德性  
甚相若適亡兒各兩年雖媼媼不熟其面也記曰內



言不出外言不入栗之兩婦其度幾乎昨新婦自靈寶至出鞋二雙壽予與荆妻孰知其與舅姑爲永訣也因語楊生楊生云妹來時以二物曾壽家君與家母殊不知厥意所在今若此誠所謂與之永訣耳於乎痛哉茲乞執事與新婦別撰一志備其美德俾將大石通刻三誌納之于壙以示不朽昔栗欲以一槨通葬三柩則栗之志亦可以無憾于九泉之下矣兒女之事累兄甚多敢以楊生狀隨書附上惟執事念之憫之臨楮泣然情不盡布而惟尊照萬萬十一月九日海再拜



與唐漁石

久違光範不勝懷仰之私春中以探親之行赴省城  
留滯月餘某事所司明知冤苦皆引嫌弗究君相極  
力明刑于上而天下依違之習自若含垢冒污僕分  
所宜耳尚何忍言伏惟執事推賢愛才之心休休無  
已方內英俊莫不鼓掌相慶以爲將有拔茅連茹之  
漸而太平之幾誠在是矣其遠且疎者或無以表見  
于衡鑑之下使太璞不登私竊忿焉每有所見擬議  
欲問輒復中止思惟執事之愛卽何可嫌昨在省見  
山東進士李開先者資性英發識見超遠文藝精典



哲匠所難治體通達後輩希覩心殊重之瀕行因與  
太微蒙溪洎韓馬河濱諸公送之東郭之外至今不  
下鄙懷者凡三月餘矣值便草草用貢台聞天下之  
善士如開先者又不知有幾人惟執事備訪力求使  
勿淪于常流則今日得人之盛蓋有凌跨古昔炳耀  
簡策者矣孰謂非執事之功也後生末學如開先苟  
得大人君子作興砥礪於上將來所就自僕觀之可  
謂國士之無雙也惟執事默求其爲人之實而加之  
意實斯文至幸聞彼欲求國子學職是又以中書付  
仲默博士付昌穀殊可惜也早夏苦熱伏惟保愛以



慰斯世之望不宜

答王汝言書

曩者仕宦時竊見世事搶攘以爲非甚難辦也特軌  
事者未嘗少加之意故云云耳每遇士大夫率肆言  
毋諱不知觸人遘怒已厚乃竟以罷官至罔爲姦人  
之黨交遊諸公或以書責我宜改易往轍得書後大  
笑索酒曰我罪蓋如是然我何能改也夫子不能行  
事於世以誅其姦乃并不得肆論其短長哉夫善與  
惡是與非其數較然明也軌事者不以爲意而槩與  
之則反手倒持惡民興善理斲風俗衰詐僞起子弑



父臣弑君母不亟爲是猶可委而弗究邪天下之事雖貴執者所共壞然豈盡持執事者之手令事之比較哉四海之遠兆民之衆事爲貴執所制者要不可以十一辟之惡風疾雷雖至盛必無終日委而不爲而謂非我所得專謬矣請以鑒喻之曩在河南日嘗屢遣人誅求郡邑矣其重求不過千金郡邑科歛千金只一項耳其錢穀轉移詞訟難易約束流滯彼豈曰治此則妨吾索可置勿理也不才之吏各欲自肥私享則是數者鈎致無不至使反此心以正理易治卽是數者悉可以裕窮民稱良治矣士大夫平居



動以古人自期謂事直未當手若云云我當如何如  
何既當手矣而又委以執力此非真有爲民之念者  
也劉養和以犯廖去矣燕憲清帖耳奉廖何乃亦去  
矣二君同以廖去其高與下美與惡奚啻天淵冰炭  
不相侔也而士大夫乃猶舍正路而弗由豈不大可  
哀耶昨常守德來繼燕又視養和爲烈矣彼廖氏者  
受侮半年何不更用前計以耐守德而甘心若是其  
道固有所難也今上無貴勢之撓下無執友之托臨  
事涖民心知其惡逆而隱忍含糊善不加恤惡不加  
警使無狀之民如羣虎負嵎而良善者卻足自廢有



天日之明官長之設刑法之禁而身制於齊民不可左右朝廷所以建官分職之意安在平日鄉黨爲善者率云某爲某事嘗言其不利今已然至此乃猶不見其賢者固以爲時有所未至而不賢者將又因以轉而不善矣此予所以瞋目於執事之臣也大姦巨惡犯禁蠹理恬不爲恠小民望誤冒法則錙計毫數洗垢索瘢持此而欲天下治平胡可得也吏長姦民侮法二者國之大弊也今長姦之吏盈滿仕局而莫知所懲侮法之民桀踞鄉里而莫知所畏此當塗君子之深憂也昨過貴邑見事執百爾狼狽以深恐懼



乃續聞公言云云及叩之在塗又有過者乃嘆守令  
所繫之重如此使郡吏一切如貴府縣吏一切如貴  
縣長此安極今日偶見敝縣一事爲上吏發至劉令  
以病不得理其丞但惴惴奉承唯渠亮所恣意耳然  
僕向爲當道言之不知卒聽否也安得公在蜀時風  
致爲一洗耶昨僕謂弟姪輩曰汝言言有內艱報尚  
能戮亮省祭使之在官數年不知又當何以而此時  
列郡太守皆碌碌不足爲汝承雖美才盛年又姑息  
寡力大抵時運使然非人力所能也

答蔡承之石岡書



一別便如數十年人生如此何以堪也海內故人屈指無幾忽得手教如飛墜自天欣慰萬萬殆何以言小兒栗所娶羨陂之女丙戌秋生一子矣乃子母並死今春爲繼娶楊叔安之季女此後兒女事俱了更無掛心者去歲自今夏南海霍渭先旣以賤名廁諸章疏春首又以一書見諭鄙人心事搜括畧盡其相知之真雖齟齬之交亦不過此顧仕宦之志自庚午秋根株悉拔他人不知石岡則知也幸九重聖明灼知不肖未便施行卽若渭先之志又有何面顏見廟堂諸君子耶隨亦具一書答之矣并其稿以上丈夫



生世固當以拯溺救焚爲心而僕則切恨世之士大  
夫賤恬退尊勢利往往反爲小人所薄鄙志如此正  
欲銷忘宿志以明士大夫之節耳前歲邃庵翁亦以  
此爲言僕力拒之今殊成怨也然亦何恤焉新刊四  
種碧山乃漢陂之作其三皆出鄙手荒忘如此可似  
雲霄中人耶心事萬千不得一一展布伏惟保愛以  
慰知交之望幸甚

與鎮西將軍曹公書

海白總戎曹公足下昨聞寧夏之變甚悲鎮巡諸公  
何以不幸如此及見行到文移乃知足下盡心曲處



如此此宗社之福也又聞躬至各部慰勞三軍此尤  
至計他人未易及也昂錦諸賊本無知小人不勝一  
旦之忿構變造逆事出偶爾其脅從之人初不過三  
五十輩爾逆事旣成聲勢遂重諸餘將吏皆亦執係  
父母妻子刼迫而然近聞傳令造舟以待北伐此固  
憂國至意夫兵事尚神而謀道宜隱也造舟之所去  
寧夏近而易見先無所處使昂錦以此扇惑其衆謂  
朝廷必用誅殄爲心彼將士豈皆明理識事之人萬  
一信其必然則外增必死之懼內乖效順之心所謂  
爲賊堅衆非計之得者也今莫若遣人詣仇鉞謀內



應仇鉞者鉅官大將非甘心昂錦者也其標繫母妻之恨卽未能啖肉嚙髓盡嚙諸賊以償耳今誠以語鉞鉞必有所計度於彼彼少信鉞計數賊之首可指日得矣况鉞又翹首望通也故莫若先通鉞鉞通然後張兵揚威遏其驍銳則鉞得有所資耳緣以喻衆喻衆則士卒之心無有不齊士卒之心齊則昂錦者几上肉耳鄙諺曰以米煮粥以水植稻蓋此之喻也夫昂錦以一日殺五大官甚能也而不能以旬日南下此非積算竢數者固畏公威德也昨公至各部勞軍其股肱已悉剪矣夫旣剪股肱矣猶可爲全乎雖



三尺之童亦知其無以爲也此大事至計不可不念者惟公察之圖之

### 與馬伯循書

別伯循甚久不能得問伯循也頃因客欲過三原托謝墓誌之寄當時匆匆不盡所言故如不問也老伯母之逝凡爲人子者皆可以哀痛摧裂况伯循履道純孝者然有老伯父及母君在也伯循一有過哀傷性老伯父若何母君若何宜思其大者可也天生伯循欲以繼明二帝三王周公孔子之道凡海內學者莫不以是望伯循不但僕與伯循私厚也近聞某氏



六郎與令兄弟作孽伯循深被其侮夫無故之侮孟子所謂妄人者也僕意伯循必不與之較耳然兄弟骨肉至親誰能嘿然宜別有以圖之也六郎行暴貴邑若虓虎亡攬也卽不姑以忍之彼或至於犯其更尊者之衣履伯循又將何以處之勝負之際市井之所向也烏有士大夫而俛與市井相較者况伯循之力萬萬不能勝耶彼所養而藉者盡市井無賴也彼賞以錙銖之利皆可興難於我彼又挾有貴父之勢如之何以制之今莫若善誨令弟使毋適中其欲闖之意而已鄙諺有曰樹大有風人賢有謗安知貴邑



所謂士大夫者無有啓彼興難以危伯循也夫與伯循骨肉生死者仲木及僕二人耳僕不知仲木何爲知伯循之事而不以告也千里之言不知果然否惟萬萬以理自遣爲是小書二冊附上啓覽乞恕所不悉也

與何粹夫書

久違懷仰何已不才宜受重辜乃冒輕典直先生陰庇天子仁聖耳去歲得手教感慰千萬非吾兄他人誰肯然也近又得孝思所寄書益感念顧隆篤僕烏足以承藉山田數畝破屋數椽差可度日幸狗馬之



疾盡無又多暇日可以採薪蒔藥此其叨冒豈細哉  
冬初見遞報知有起復之命私心甚慰蓋時事若此  
安可無賢人以立於朝備倉卒之用今漢中蜀楚之  
盜方熾未艾而來治者率之統御張弛之道輕褻國  
威厚助賊氣其經畫糧餉之人又務爲苟且迂濶之  
計百姓百倍陪費不支一行之需賊勢更盛當復云  
何爲吾兄者固不可堅臥東山也友人楊吳二君來  
值有手足之瘍不能盡所欲言惟保重保重

答沈崇實

僕來持奉教札兼及碑帖之富感激至意何限斯文



骨肉乃雖古人未之前有也不肖固執愚行雖萬萬  
死生不可搖動所以不能無憾於中者誠以斯名之  
難居也修之於平昔而礪之於今日得志焉將以加  
諸天下否修先王之道以終乎身而顧冒被污穢如  
此何以爲人也士之所哀莫甚於名喪節靡而身死  
不與也今不肖已喪名靡節矣即使長生百年有顏  
回曾子之行程伯朱季之作亦不可自明於千世之  
下此固志士之深悲也人常言志士不忘在溝壑勇  
士不忘喪其元然固不敢不勉耳又安肯稍自貶釋  
以從時人之情爲進取之計邪有一於此死無面目



以見先人也城南之事乃自斯人得志之後與敬夫同感孝廟恩德而然非僕一人也至於晝夜千萬謀畫欲以毆此實有之雖今日亦不敢忘也況當時邪然惟天地祖宗及我孝皇聖靈默鑒而已辱念隆篤有國士之與故敢率爾答謝若他人則閉口矣不能贈送旌節徒切倚望伏惟爲國自重萬萬

答栢齋先生書

僕生平服義重德直行亮迹而已其他虛恢盜名隱忍委曲以要時好死不願也承教云得報以來且痛且恨所痛者執事平生之心可以對天日有伊周之



才之志不得少行於時所恨者凡事輕忽簡畧不存形迹卒罹大謗蓋公愛惜不肖之深不覺言至於此感服高義比之父母更復何言伊周之才之志僕之污穢所不敢當不存形迹卒罹大謗此政僕之所以爲僕者終身不敢易也僕犬馬之齒才三十有六雖更事未熟早作夜思從事於斯要亦久矣語曰君子素其位而行不願乎其外又曰智者行其所無事而已於義有未當理有未喻雖聖賢令之行僕不敢也苟理喻義當矣雖人人掩口笑道僕行之也曾參之自信自信不殺人耳母之教杼踰垣參不得而知也

僕向罹二三子之謗能勿殺身無幾也蓋是時瑾方以君子之言禁士類二三子者不謂僕爲小人也今又罹諸君之謗能勿殺身亦無幾也蓋是時大臣方以小人之惡飭士類諸君者不謂僕爲君子也由二者言之僕一身何兼被俱有如此蓋苟可以去官殺身於我則君子小人者非彼所擇也其至於此雖存有形之迹何裒哉老兄斯文綱領當世指爲山斗之士覽見余書當欣然大笑曰此誠栢齋賢弟良友不以險夷易操者也然後終身佩而頌之永爲老兄所不棄矣兒子昭允歲首已出痘子無恙今能言且行



承問具告冬寒伏惟保愛幸甚

與賈鳴和書

相別久矣忽辱手教感荷無已自被罪以來數不能  
通問士大夫之間者蓋捫已自照不可輒以荒穢之  
資謬自比附耳教中意念隆篤顧僕安足以當含灼  
而已細思往昔憂惶恐懼之日今得脫然不復拘禁  
此其心蓋有不知所以然而然者而好事者又謬爲  
異論如彼雖有非而辯之之人又挈小遺大引粗失  
精亦豈足以識豪傑哉此可爲南塢子言發一笑耳  
家口雖衆田作足以供之無歉故每得從容南山渭

水之間又得爲野圃野醫種蔬蒔藥暇則茹蒜酌酒  
負小坐小軒拊絃倚唱欣然終日人莫得而奪也至  
於開筵列饌品竹彈絲貧約之士力鈔財匱固無得  
而辦也然君子之樂亦莫須此此皆日用之實敢以  
聞老兄老兄知之想當欣然一大笑也邪小書二本  
附上備種數猶爾不悉爲之奈何千萬保練不宣

答楊宗文書

范生來承手翰具知李生事情然事已如此關內鄉  
大夫豈能人人白哉執事惟善處耳良度負公固厚  
然已死矣則平生私憤可以悉爲掃滌至其諸孤則



猶士大夫子也今不知置念已乎他日鄉人一相視  
效豈不可寒心哉王學諭資質誠美然行不知禮少  
不更事亦所不免旣惜其才當教之以平易易親豈  
可深礪慘刻如此不日王令來歸印於縣可能更若  
是邪李氏諸郎愚昧謬妄豈但今日教中後將噬臍  
之語其迹頗涉忘諱宜更思之李氏於我有何厚而  
僕言如此凡以爲執事也芻蕘之語始雖不堪聽徐  
而思之或有可采者不得面陳切仰珍重

邑後學

張廷梅與松

校字

孫燮午卿

康對山先生文集卷之三

後學

同邑孫景烈孟揚選次

長白瑪星阿景謙叅閱

王應槐兆三

邑後學耿性直伯正校張書紳公佩分校

何瑞雲卿

序

雍錄序

雍錄十卷宋龍圖學士程文簡公大昌之所著也謂漢隋唐皆都渭南雖稍遷改而相距不遠尚爲易考



若夫周秦兩世自初興以至遷滅屢東屢西不常厥  
邑固不可循世次地望泛而言之於是以渭爲經而  
五代都地隨列渭旁能沿渭以推其方而雍關地望  
如指諸掌矣此其書之大槩而其雜相考會則悉本  
之潘岳關中記與三輔黃圖六典長安志及邑圖閣  
圖所以述雍之故蹟小大靡遺矣然所圖或有差誤  
皆按冊擬議而與圖閣產其地而親見之者不同予  
是以傷載記者之難言也往歲予友大復何子仲默  
嘗爲雍大記顧其書垂成而卒悲夫昔仲默蓋嘗親  
以亭列屬予矣顧今猶未逮固深念其用心之勤期

有暇日當卒成其書以副厥所託不知能否也知西  
安府南埤李侯文極政通民和之餘盡取關中故志  
刻之以傳秋七月省災過郃因以雍錄屬予爲序於  
是著所私見於首以貽考古之士然關中之蹟大抵  
諸書幸存得有所考讀其書者又當有以識侯之用  
心焉可也嘉靖辛卯秋八月丁亥序

### 長安志序

關中故有長安志刻之省署歲久亡矣予家有舊藏  
本嘗因其引類得其緒理喜關秦之跡頗爲明悉易  
見間有踳駁則據冊而擬欲盡固難也其書爲宋龍



圖學士宋敏求氏所著程文簡謂宋氏家多古書如  
宮闕記宮闕疏關中記廟記三輔黃圖三輔舊事皆  
所采據信哉夫自成周以來關中爲歷代名都其人  
文之盛固不待別錄而後知者若其遺跡故趾所在  
田父野老之妄旣荒唐難信而學士大夫又不能闕  
疑存訛徒欲以遠而莫考之事畢議一旦若山海經  
之誕水經之誇括地輿地之志靡曼皆是也孟子曰  
盡信書不如無書予於武成取二三策而已矣孔子  
曰吾猶及史之闕文也後之君子得是書而讀之會  
其領畧可也而欲遽以言語文字之間定數千百年

之疑誣矣知西安府南埧李侯刻是書成以予爲序  
故復之如此蓋其所刻皆關中盛事云爾嘉靖辛卯  
十月庚寅序

漢陂先生集序

漢陂先生者鄠杜王子敬夫也我明文章之盛莫極  
於治時所以反古昔而變流靡者惟時有六人焉  
北郡李獻吉信陽何仲默鄠杜王敬夫儀封王子衡  
吳興徐昌穀濟南邊廷實金輝玉映光照宇內而予  
亦幸竊附於諸公之間乃於所謂孰是孰非者不溺  
於剖劘不怵於異同有灼見焉於是後之君子言文



與詩者先秦兩漢漢魏盛唐彬彬然盈乎域中矣獻  
吉仲默子衡昌穀之集皆已刻行而敬夫獨未也去  
年秋敬夫冢器順天通判瀛內艱讀禮之餘彙次其  
集凡若干卷詣予請序將藏之家塾今年春二月予  
東遊華山會監察御史咸陽王君惟臣於臨潼曰漢  
陂先生之集獻遊門牆之日久矣願有志於傳而未  
能今承乏山西嘗得其定本於瀛將以示乎三晉與  
天下之士執事幸有以教我也予觀漢陂先生之集  
其叙事似司馬子長而不屑屑於言語之末其議論  
似孟子興而能從容於抑揚之際至其因懷陳致寫

景道情則出入乎風雅騷選之間而振迅於天寶開  
元之右可謂當世之大雅斯文之巨擘矣夫德不孤  
必有隣藝文之士抑儕以自高妬羣而取亢皆是也  
予觀孟堅之於子長竊隘心焉故歷述明興之文由  
於諸公者如此於乎後之君子其將有感於吾言也  
夫罪於予言也夫嘉靖十一年壬辰三月丁亥序

### 漁石類稿序

漁石類稿者總制軍務兵部尚書漁石唐子虞佐之  
所撰也唐子巡按雲南江西提學陝西掌憲山西督  
漕淮上及今凡若干年其所爲詩若文以及奏議文



移之大者皆於是乎類載之間出以示陝西提學僉  
事鳳泉王子惟賢因刻之以傳謂予知唐子者宜序  
諸其首予讀是篇所載爾雅正大春容涵渾可與今  
昔名家頡頏上下世儒摹倣剽斂偶中臆得於萬一  
者自難擬倫也唐子嘗言文不如先秦不可以云古  
非誠哉知言者乎人謂唐子機軸本於左氏而无隱  
僻艱深之習議論肩於董賈而有溫柔簡重之致然  
其歌吟篇什又言不下帶道罔不存固不待上法漢  
魏中契盛唐而後善也唐子方將以功業左右昌時  
上修方叔召虎韓范富歐之蹟其文章緒餘又復若

是豈詩所謂文武吉甫萬邦爲憲者邪緝文之士當自有以識之士有體有用若唐子者可也嘉靖十一年壬辰秋七月旣望序

鄠縣志序

漢陂先生旣爲鄠縣志時南臯公在陝西撫堂聞之取其稿付知西安南埠李侯刻之以傳謂志者記也記其地之沿革風俗異宜與政教文獻之大畧爾顧世多昧焉弗知猥繁冗雜漫不足視刊是志所以啓後之作者使知方也而民之疾苦役之繁簡政之得失官師之淑慝咸於是乎具之又所以昭鑒戒愼從



聖山文集 卷之三 五  
違其訓遠矣李侯承命唯謹遂付之梓人刻將成漢  
陂公以書抵予謂予當序諸首予惟鄠古豐鎬之地  
周之王京其故蹟遺墟雖父老无知也況其文獻乎  
予每以語漢陂公冀亟爲之乃南臯公有此佳舉豈  
非是地之一幸乎遂序其歲月於首以示鄠之後賢  
君子知所自云嘉靖癸巳正月念又一日甲子序

登峨山詩序

陝西左方伯安厓黃公以在蜀時所詠登峨眉山詩  
一帙寄予曰是編所載頗具峨眉之勝予其序之於  
首將藏諸家笥以識平生遊眺之槩俾後人視焉予

取而讀之其條理燦然卽不至峨眉已若坐詠累日  
者矣公昔以名進士改庶吉士讀書中秘詩名滿翰  
苑予嘗得觀所作於同年南里憲副宅辭翰兼美玉  
映金輝固方今之雋筆也乃復見是編又重之以安  
厓之請是安可辭爰記歲月於簡以示讀公詩者考  
焉夫精而典者文之致也詳而諷者賦之方也公詩  
咸有焉豈但示諸後人雖傳之於世可也公以爲何  
如哉嘉靖癸巳春二月己丑序

炯然亭序

監察御史兩厓朱君子禮表其師陽明山人伯安政



學篇惘然之語爲惘然亭縉紳大夫或爲記爲文爲詩爲歌以識其事旣成巨帙諸君子以予序其篇首予有以歎朱君之好學也夫旣舉進士服官政矣乃孳孳於學如是宜其行義文采卓然於時學之有益於人如是哉黜襟之子蓋莫不知學然售一試得一譽卽睨視萬物先生長者立於前漠然若无曰此何草草章句者陋哉非吾侶也情蕩而志驕中溢而性枯曾不知身何以自立而曰吾將以彌綸天地之化也行何以自善而曰吾將以裁成萬物之道也於乎予自弱冠以及今所見皆若人也寧非朱君之罪人

哉信乎陽明之教非朱君不能炯然於心學而至於  
炯然於心則推之心庶其可以彌綸裁成矣夫敢以  
是爲諸君子復因併以爲學者告嘉靖癸巳秋八月  
甲戌序

送趙世忠序

天子卽位之二年兗州闕守吏部請推擇長者有德  
教能化民者詔以監察御史馮翊趙君知兗州府趙  
君同爲御史者咸以予爲鄉人當以贈趙君也爲說  
之曰夫趙君馮翊之美材也馮翊之士能以節義治  
行顯名于天下後世者至多也其浩然之氣蓄之于



貧賤之素而加之于百姓之上者趙君豈異也余何以能益趙君者夫諸君之意豈不以御史所守者約而所及者廣太守則繁劇駁雜欲事事皆親與切歷礪劘然後濟也吾昔在鄉縣以試事歷太守之府望見其事紛然亡有端則必以爲甚難莫如太守矣蓋御史之令皆裁自我者太守之令其監司省部者能奪也夫奪則志不可以貞而廢時矣理不可以致而更慮矣廢時者莫能以自宜更慮者莫能以自固由是君子之致莫能聞於天下也故吏部獨以君守究州焉曰長者之意當以格其上吏使勿以奪志也德

教則親民可不畔也雖以天下亡難焉而況乎兗也由是則君之爲兗州可知已矣今兗州之民濱之于海困之于饑饉疲之于科役若亡有能蘇也以君能二者之美焉則由是使兗州之民有禮讓足食勿匍匐勉強者孰謂非君也又况鄒魯之地夫子之里邪君吾知免已矣

### 送東原先生序

昔先人在時以海方總角當教以正歷求師之賢者得吾東原先生曰他日使吾子爲禮人不聞過于鄉黨父兄者必牛君也是可以教吾子也翌日通于使



者以幣從于先生之門先生言動視聽皆有典則海  
時且幼且劣望之屏然不敢出息居數日心苦不自  
伸數月彌苦曾曰此生不能聊也先生所論皆道德  
性命之微浩然而出靡有窮也故今所以不至大惡  
狼狽以辱先人實先生使然焉壬戌三月海舉進士  
先生適以歷事在京師其所教猶靡有間也明年十  
一月二十一日完事將歸凡交於海者相爲五七言  
詩贈先生先生旣而命海叙也故遂以所受之先生  
者道之且以餞先生之道而欲有以勉焉者也

送虞坡楊子行邊北還序

今年春二月天子方南狩觀卜顯陵起相國石門公  
往視九邊布政令敷恩澤石門公以贊貳上請命司  
馬大夫虞坡子往焉由宣大而西至甘肅冒暑隆歷  
嶽嵴凡七閱月而九邊視畢節麾所至邊人无小大  
咸感激思奮慮无以稱荅休命石門公自以得虞坡  
子爲慶而藩叅南溪張子乃以裴晉公比石門公昌  
黎公比虞坡子予以爲知豪傑之旨也虞坡子昔仕  
關內數以予遊歷蓋屋長安二大縣豈弟之政貞固  
之操民至今誦之其休休之量明哲之資超邁之見  
殆若天授及轉官司馬部予竊以爲邦之遠器當在



若人因與諸士大夫言之而石門公果今獨知其賢引之以偕茲使英雄豪傑之在人代雖顯微異地天下後世未有闕之而弗知也況同時同事於石門公哉擬人必于其倫予于南溪子韋焉虞坡子大人舜原侍御昔嘗令扶風惠政在民虞坡子將過扶風扶風士大夫感舜原侍御之愛以予言贈虞坡子予方幸虞坡子能再予見也其所欲言於虞坡子者雖備歷晨夕未盡也况酬應數言哉今邊計方壞而將領威薄加以兵微食匱正君相所當拯拯劑量之際也歸奏之後凡所望于石門公與虞坡子者奚但予與

關內士大夫而已也夫耳之所聞目之所見將孰爲親九邊之事予烏得而不望石門公與虞坡子也

送白貞夫序

予居潯西山房二十有七年矣客過訪予者率以載之賓遊識久要焉然非卓然道義弗予也今年夏予與浮野呂仲木氏南里楊用之氏同過彭麓山房眺南山遊普緣普緣爲故仙遊宮山廻合而水圍繞氣磅礴而景葱蒨宋東坡蘇子瞻氏蓋竒其勝數往遊焉曩予與仲木屢訂茲約正德壬申至而阻雨粵今十有三年始協茲遊北至彭麓攜榼命與矣而洛原



白貞夫氏自晉陽來關中望華矚河觀周秦漢唐之  
墟挹豐鎬岐雍之盛方自鄠杜訪漢陂王敬夫氏而  
西也聞予與二子在彭麓卽躍馬過彭麓同二子循  
黑谷抵普緣周覽遐眺懽悰畢陳降觀子瞻塔陰記  
及游景叔題名已而嘆曰茲無負於普緣矣事不前  
約而一旦卒同非數也耶明日旣晡仲木東邁用之  
有事渭川精舍貞夫同予北行過訪潯西已而出平  
湖屠氏所贈文則貞夫此行蓋不予棄也然予逃形  
物外二十年禮法之士未有弗疾者貞夫則何取於  
予哉居數日貞夫北行畢使後二月復過訪予明日

值予病與予弟德充眺黃山覽武川訪邵墟涉澗

一作

建

子窮慶善之繇歌生民之雅其興翩翩然矣翊日

予病小瘳方能以醴酒酌貞夫則南充任少海氏適  
至遂同坐夜分而去約以明日同過潯西值雨大作  
弗果夜仍同宴世爵堂焉貞夫少海世之二雋又爾  
相值誠亦奇矣明日貞夫辭予行予觀貞夫悠悠然  
有逸思焉於是握手語貞夫曰今士大夫尚浮名而  
趨末務偶善一詩成一文則矜炫馳肆目無全物卽  
上追屈宋中驂班馬藝而已矣况摹倣剽敘文實俱  
鮮此文士之鄙習非國士之鴻操也國家以崇官好



爵養天下之士者恐百姓之未安萬化之未洽也若  
此何耶貞夫論事滔滔萬言條理罔謬厥存述矣夫  
揚休烈道情性古之人莫不用之而予意則苟求其  
志而已詩曰言志今之爲詩者果言志否耶夷觀而  
試省之則思過半矣貞夫往哉野人之言欲無負吾  
貞夫爾非方居而忽逃也貞夫曰此予志也遂書以  
贈之甲午八月戊戌序

姜武功使臺旌勸冊序

武功者西安最下邑邑小而道衝民窮而用繁爲是  
邑者誠亦難矣廣安姜侯以進士來知武功訪民疾

苦而加之治於是民熙然應之故不踰年而武功治  
行屹爲關中第一自撫按而下臺省諸公皆交章旌  
舉其禮幣優勸殆無虛日侯爲是邑又何其易也武  
功諸生私自相謂曰夫民視令長爲憂樂者也今百  
姓力不愆庸財不愆賦是令長之德厚故治明政通  
吏不淪度民不易軌也吾與諸君親沐其教益而覩  
識其成緒不有紀述傳之方來是昧長者之誼杜方  
來之倣非所以稽誦古昔也於是取撫按而下洎臺  
省諸公所薦論勸勵於侯者書之於冊而實之以行  
事頌之以歌詩旣成帙矣乃詣予請序諸其首予旣



三復其書乃慨然增懷焉名實之相倚其應捷而效  
長與桴鼓者奚異哉夫子曰君子之德風小人之德  
草草上之風未有不偃者也予自戊辰以先太安人  
之憂歸今家居力田二十年矣民苦於租庸歲相比  
也當塗君子皆知憂民之疾苦而所以處其疾苦者  
顧寥寥無聞何耶予聞其論議未嘗不重自太息以  
爲斯民之不幸遽至此極及侯之治武功量田之肥  
磽以定租較丁之強弱以署庸行不踰年百姓安堵  
室家相樂修禮義厚風俗期無貽怒於我侯雖三代  
之民亦若此而已其應不已捷而效不已長耶夫租

庸者國家之重賴而民命之攸繫也當塗君子不能  
探求其本徒以獲一事見一弊謂吾志已盡吾令已  
通此不思之過也今百姓之憂樂豈直一事一弊哉  
獲其事而因之見其弊而更之尚慮其有他也況無  
所與因無所與更哉故雖日夜奔走徒以重勞輿皂  
民無益也夫民情土俗天下之廣吾弗能知由吾關  
中之事觀其大畧亦可言也桀民恃蓄而撓法姦胥  
甘賄而易令故富者益安而貧者益困其所由來非  
一朝一夕也侯至定以約束示以明義准丁力之歛  
豐罷門分之抑勒不刑一人民志允愜予嘗趣侯書



所計度刻之堅石以貽來哲俾民永終嘉惠侯則謙讓而未遑也乃諸生能樂道其休美而形容詠嘆如此彼謂見善如不及者非耶因遂以所先乎民者書以歸之若夫決訟若流擿伏若照則侯之餘事固不能以徧載備陳焉今之爲令長者亦安能人人若侯使民自慙其志如吾武功也排年之人聞侯將擢官去已咸有憂色以爲及已應排不得與被其政侯尚可謙讓其計度哉嘉靖六年歲在丁亥夏四月十又二日戊午序

送東谷子序

西安太守廣川趙侯以書抵予曰東谷內遷戶部員外郎久淹之餘知已如吾子良足嘉悅茲有餞贈之文以勞於執事是惟吾子之不讓也夫東谷子自入關予卽與交今凡十年矣所以劇切於予而益其所不能者方之古人蓋有回路之義焉然東谷子操嚴而中坦志遠而外直賢者慕其義不肖者忌其才故入官十五年僅有是焉此非其慮之弗長而際之不融也其忌者害之也東谷子檢身治民裁費節用尚本崇實蓋屋與涇州之民莫不懷也篤履愼官鶉衣蔬食先人之所遺平生之所志何不臧也今天子以



仁孝治天下安知東谷子不由是以大行其志於時  
邪夫士固有誦於始而申於終者矣東谷子之名義  
士大夫庶民小子人人能言之雖有惡已者不能加  
也據是以往凡所以報稱於時流惠於民者可以稱  
然無憾矣東谷子往哉君子之志以自強不息有息  
則餒非君子之所貴也昔者與東谷語每夜分莫能  
去者固非如世俗彈碁博塞流連尊俎也凡以探天  
地之化昭豪俊之業焉耳天下之事未有中無所主  
而能至者况以或存或亡之心參之故治日常少亂  
日常多者士大夫之過也廣川以英偉卓犖之器當

紛糾劇冗之地其所以應之而有餘處之而皆當者  
固其中之有主如是也孔子曰三人行必有我師焉  
彼猶待於其所已行而損益其過與不及借以自勵  
雖之天下可也東谷子其往哉尚默繹於予言而終  
廣川之誼是則廣川與諸公所以贈於東谷者咸有  
光矣東谷往哉

姜武功平賊序

昔予以正德戊辰歸見三數處風俗則慨嘆興懷焉  
曰嗟乎何至是者是必將有厚憂隱禍迤邐未艾也  
否則何至是者居數年乃日日異不同也曰嗟乎其



厚憂隱禍且成弗遠也安得賢且才者與告語之特  
一輿阜之力可攘也乃得巡撫都御史藍公文秀巡  
按御史王公子衡二子先後至焉曰是則吾所謂賢  
且才者也失茲不言福將焉致於是以書予二公曰  
某地事十年後必有大憂事關生靈僕不敢默惟公  
求倡始者數人薄治之其羣從渙然散也二公曰唯  
唯乃下其事於其長其長不知旨意喧喧溷溷乃藉  
是將要以爲功也其衆紛然因賂以訴於他司他司  
喜其重賂二公之志亦寢後八年乾州有狂人樊伸  
者多貲而樂誕方士誕者皆集於其門附會伸意行

諛於伸云伸當大貴於是傳播遠近所謂三數處者  
舉熙然從伸而伸遂自居不疑日召無賴男子習戰  
修武來者雲集又令妖人以照水法惑之俾無畔志  
洎三年陰相結聚者十數萬人廼於嘉靖乙酉秋集  
黨寇乾州賴州之士大夫暨守力禦之日晡逃去走  
南山結銀兵復謀北寇郡縣震動若不克生獨武功  
姜侯練兵有素人得無恐報至侯下令曰伸輩皆膏  
梁子徒以妖師扇惑至是其羣黨固烏合也卽果南  
奔礦場必假道立節橋頭凡濱水諸村落宜據舟密  
候其至共力與擊賊可悉擒明日昧爽賊果至諸村



落人執挺拒賊賊悉從涉渡逃去獲馬及器物村落  
以馬來侯卽以馬賞獲者曰能得賊賞更不直此於  
是人人奮志思獲賊矣日中果有執賊至者得伸所  
給號帖已署有僞官乃立磔於市而厚賞獲者凡涇  
威興醴愚民爲賊惑者舉不敢南邁應賊賊居鐵爐  
庵五六日候應不至始決意趨礦場又二日賊首悉  
爲于敖輩所擒無一遁者故賊黨悉平焉比賊東獻  
馘醜猶曰非武功所阨不及是也於是守廵撫按諸  
君子咸推功自侯上功於朝而侯之規畫誠已奇矣  
武功諸耆老相率曰乾州破吾縣有禍猶緩乾州不

破賊合衆南下必先甘心於吾縣吾縣非侯勢必大  
壞又安有今日者于是繪圖請序述其事於首以報  
侯保全之功潞西子曰伸之敗人知爲教輩設巧善  
獲然發軔卽衄獨不以姜武功先事治兵哉及圃匍  
涉渭志灰然盡矣耆老之請殆亦有所見乎故予重  
之以此令示諸當事者

贈巡撫陝西右副都御史藍公序

夫志大者器宏才厚者德溥此古今之通道也惟宏  
且大也故聽參而用博小利近勤勿撓焉惟溥且厚  
也故持重而不誇盛位恢勩毋動焉二者事異而理



同道分而究一皆俗儒所難喻也故天下無事則可以巖猷而嘉治有事則可以戡定爲安輯所謂天下不可一日無者明興百五十年學士大夫口不輟詩書之誦心不廢經綸之想志非不皆有才非不皆長也然以之治事而事或乖修業而業或廢者器有所弗宏而德之備諸身者少也歲自乙巳以來蜀兵初變衆才不過數百至易擒也當時用事者一失其會遂至不可以爲浸淫五六載寇益盛攻益難合三省全力不得半勤此其故非兵痿將蹙也繼而劉齊諸盜起中山山東山西與河南徐淮諸地所過殘滅無

釜餽之遺男女幼壯者被掠老弱者蒙死江西諸賊  
乘其餘習益又驕悍難制當是時上蓋數以戡定之  
勲責功伐名譽之臣矣銳者或闕於持固鈍者或廢  
其幾宜明者或過於輕忽暗者或昧於策理四者非  
所以用武博勲也然是時亦能殲賊而安壤者固有  
所謂志大而器宏才厚而德溥者陰以維持於其間  
銷其變而已其患也夫承制備蜀三省之兵關中爲  
最盛也自彭公之西也其奮擊之士才數千耳數年  
滋蔓難制之寇不待彭公來所以不敢再窺漢沔以  
掠關南之民此其道非騰遊說懾靡寇志也禦之有



繇而持之有數得長者至誠惻怛之守綏懷其民心  
堅厚鞏固寇自不能窺也故予嘗私論之曰蜀漢之  
盜非藍公無以成彭公之擒非彭公無以見藍公之  
慮此可爲百世不刊者也茲聞上以藍公爲南京刑  
部侍郎公行在旦夕然平蜀之勲終始由公甚多吾  
關中之民所以能保其屋廬田畛者秋毫皆公賜也  
因著其所誦說者於篇以贈公使夫功伐名譽之臣  
凡有當上之責者皆知其自進而不內民於溝壑而  
莫之知也

送朱升之序

夫折堅斷勁剗犀剗玉無向而弗利者良劍之用也  
沙汰湔濯鎔鑄煅鍊精光愈新者兼金之質也故士  
無炫譽當事乃奇驥無異足登塗則妙君子之節豈  
可約以細人之屑見齊以鄉黨之鄙情哉故葛藟生  
於高山之上非其才有凌於梗枏松栢也犀象伏於  
澶洞之淵非其體固亞於猿獠麋鹿也高下之分定  
而倚托之勢殊也故觀士者不於其細而於其大亮  
才者不於其明而於其隱二者所以斟酌豪俊窺識  
英妙之方也然五穀顯名於秦穆子臧彊迹於威宣  
子臧越人二君者窺識明而斟酌當巨細靡遺隱顯不謬



故俗議不能繫浮辭不能奸也至若其思戮身於鄭  
武伍員盛尸於鴟革豈其誠未達於上而議不竭其  
智哉主疑而讒入故志阨行塞身死用弛也曩凌谿  
子提學關內勤勤懇懇若將一變而至於道矣加之  
以年則學者誦習之力豈或少讓於浮梁君哉細人  
倡之衆人和之故皜者見污純者見疵使聖天子公  
卿之明少虧於秦穆威宣則凌谿子安脫於羣口也  
今倚泥成俗苟且持論非一日之積也故私者蒙譽  
而愛者見拔拂者被詘而異者遭遣彼徒以太阿假  
之曹侯宏樞委之碩讓皆非其事實也士大夫者公

論之所繫也今異說悉出於縉紳而公論不稽於古  
訓是仲尼邪僞於衛而夷齊瞽昧於周之日也卽有  
才美上安所聞卽有邪罔上安所察故志士甘心而  
就辱豪傑長歎以遠世者非有以馳想於下許致薄  
於伊周也勢旣無所容而數固不可易也夫廉清修  
潔行能純備者孟堅所以誦李育也苟以熟觀於凌  
谿子則育豈復敢結駟於齊轂抗肩於周行耶然凌  
谿子則反之矣聞凌谿子改治滇南故予得私敘而  
贈之焉此學者所共覩而當塗者所宜慎哉甲戌夏

五月序



送大復先生還信陽序

大復先生居關中四年矣今年夏六月以疾求去上下固留不可其官屬及諸生之在正學書院者不欲遽別於先生知予之與先生友也於是以予爲言贈先生焉夫師生之際教化之首其居至不易也近名者先要結而後軌則昧理者崇虛飾而乏精典茲二者其始也覩焉若親感焉若躍戀焉若不可一日去而其究也颯颯焉興怨焉鶴鳴于九臯聲聞于天物誠而形本實而茂自然之應不可強也上以僞劫其下則下以詐姦其上教化興行之地持此以往將安

極哉大復先生之來吾關中也曰教化廢壞者上下  
安於所習而不變也夫安於所習而不變則宜其廢  
壞亡揅也可不作而新之振而起之乎於是具以科  
約示以程式先之以身而董之以實行之以嚴而推  
之以恕其初也疑而弗信畏而弗親而其中也幡然  
而悟沛然而從曰學者之事本如是乃何者恆恆惕  
惕若前日耶故泛者畢定傲者畢諧崇其實而脫其  
僞先其事而後其功有若董生之論焉夫諸生欲贈  
大復先生歸而予泛及其事如此畧情而弗言者蓋  
先生之於諸生以道而合而秉執教化之責者其理



當若是也或曰賤功名而黜聲華固先生之已事今天子龍飛之始首重教化俊乂畢升而先生乃以疾行豈孔孟之訓有然乎曰出處者聖賢之大閑而先生之所慎也安有高宗爲之君而說終傳巖者也蓋有疾而歸德合而出君子亦行其所無事而已矣是何以疑先生哉諸生曰乃今聞夫子之所命矣於是請次第予言贈先生焉

送西麓大夫序

西麓大夫既有男子其同官楊大夫名父首爲近體詩爲大夫賀與大夫同朝者又皆和楊大夫之詩以

賀大夫大夫以予爲鄉人交又甚厚也盡持其詩於予曰子盍爲我序之使吾子苟長大能讀書省事吾苟欲其爲善人將出是詩以示而歆動焉彼必將遍謂其詩其人也吾從而語曰此詩爲此人此人爲此詩吾子必曰此皆所謂大人世所謂若神明之不可見而親也何吾之初生皆吾喜焉是吾之生異乎人之子之生也必重自激勵以自盡力於所爲曰吾使不愧是言也吾子感吾之言必重自激勵以盡力於所爲則子之子我者不亦大耶夫教之不施於父子之際也蓋謂狎而不可加爾故孟子曰父子不責善



父子責善不祥莫大焉其曰夫子教我以正夫子未必正也則夷也可以使父子之際而相爲夷乎大夫之所以教乎其子者固有出乎古人思慮之外者矣子其由是而成乎雖有抱奇之士使雜於稠人之中無所相聞焉則志消氣耗不與屠販等者幾希有一人能自振奮以出乎物則已必警然自訟而悟矣况得於累世積善之餘者哉夫固必能以自變也而又况如此爲之啟之則其奮然往者寧肯一善一藝止耶大夫之子吾今知免矣夫詩通記若干首首名父大夫其後皆和者與各自爲者云

送武功丞李君還高平序

昔聞麟遊丞李君之政聲若不克見也乃後數年以憂制去旣而起復吏部則以爲武功丞武功士庶有舊遊麟遊者相語諸人曰此所謂李麟遊也乃至是乎行必有善政及於吾民矣予聞之顧甚喜乃君枉訪予與之話言翩翩然長者也有學以蓄其用有政以達其學政出事立上不抗令下不斲民傳記所稱奚加焉予則以爲益友時與之遊潞西山房道古昔玩詞藝知名之士未能或之先也今年秋偶以微疾求去曰人生適意耳吾老不能副丞丞非所以優吾



之老者盍歸乎來以與二三子遊於里閭誦說聖君  
賢相太平之業暇則教其子弟使爲善人於焉終吾  
之身不猶愈於日匍匐車塵馬足與簿書筐篋之細  
哉狀旣上撫按藩臬皆重君之才名不欲君遽去君  
不待報飄然以歸武功士大夫重君之行具以予言  
贈君然予且老矣安能以殘羸之身應酬賓友之請  
實有以重乎君之爲人是以呵凍爲此使後之人知  
君之才之美果有以感孚於衆如是予竊怪世之人  
徇利輕已不知歸爲何事徒以妻子之奉爲不足而  
日孳孳乃或至於并其身而俱棄者君年才六十又

二體強力勝方將有爲以速後勦乃於富貴之際視  
若敝屣畧不以爲意念與所謂龐眉皓首浮沉利途  
者殆天淵不侔矣豈非養之有素決之有勇高出物  
表者哉君冢嗣良臣嘗及予門勤學善養將來所就  
當爲名人不但取科目拾青紫而已君歸以方盛之  
年優游桑梓終厥天年鄉人稱之後世誦之與今日  
居陞大位驅遣放逐而戀戀不捨者回視殆不可同  
日語也良臣勉哉詩曰教誨爾子式穀似之記曰善  
繼其志善述其事他日陞顯履榮盛其亦澹焉若  
無以克肖而君之行事可也良臣勉哉予日望汝之



自礪以爲予與而君相友相厚之勗焉耳

送邵銓序

崖州邵某以禮部乙榜除爲來賓教諭將行於官其友翰林吉士黃子實以予述序以贈邵君有氣岸能尚志由由然合於古人之道也夫以文字試禮部者凡試幾四千人四千人者皆又於其鄉亦數千人摘而舉也而但以三百五十人其舉若以遺矣意而欲同焉字字而欲稽焉繩尺法度錯錯而欲亡有背焉其豪放不羈者故恒弗逮也邵君勉哉夫士固當欲有以遇也遇其人矣不能有以立遇之道夫猶不遇

而已夫繩尺法度雖非所以盡士者顧求之者率是用焉苟豪放不羈者稍自我損就之則天下莫敢京也邵君勉哉儒學之官雖古人所重者吾無以願邵君知邵君所負者厚可以有爲使國家風化於世者益隆也雖然吏部所以予君來賓謂宜可以小試君也來賓之敎果而弗庸焉則吾所以望於君者益以信矣吾所以望於君者益以信而於其身乃猶有弗遇也茲可以謂命而已然而如君之所負者固未有終其身淹也

送陳茂之序



古人養子必教之以詩書爲有義方父教而子不之學則固不足以謂之能子子欲學而親靳焉雖有良志者終廢弛不作而已故親也教之子也學之然後子有善學之益親有善教之譽中養中才養才而人樂有賢父兄也長寧陳茂之有子列師族子永嘉余因永嘉識列由列又以識茂之之能教也列性雅重美儀宇學爲文章駿駿乎若欲進取如探淵與師友所相證者滔滔乎有也進而不已烏知不合於中庸之道耶吾於茂之有喜而於列有望也今國家禮重賢俊之士列之有造果如彼惡知弗爲之錄耶然列

固爲人之子顯姓揚名必能有處於大者鄉人以列  
新爲縣學諸生且重其爲按察王君之選率來請序  
以贈予愛列而欲內諸道者安得不以是爲茂之告  
之使夫爲父子者知有所勸也

邑後學

張廷梅與松

校字

孫燮午卿



卷之三

三

